


## CUINTRI IL TIREMOLE AL RIBÀS DE MAIORANCE REGIONÂL, APEL DAI AUTONOMISCJ A ILLY PAL FURLAN A SCUELE. «GUAÏ A METÌ MAN AE FORMULE DAL CIDIN-ASSENS»



Te foto di çampe: Arnaldo Baracetti, Gianfranco D'Aronco, Roberto Dominici, Geremia Gomboso e Carlo Puppo te sede de Regjon a Udin.

# «Nissun pas indaûr su la leç»

Honsell: «O si insegne il furlan tes scuelis o lu si bandone. No je une tierce strade». Baracetti: «Illy al fasi il president di dute la region, no di une part»

**C**UINTRI IL TIREMOLE de maiorance regional di gambià al mancul il test dai disen di leç pe tutele de lenghe furlane, i autonomiscj a disin vonde. E a riclamin il president Illy al rispjet des promessis fatis dilunc des Assisis des rappresentancis furlanis dai 11 di Setembar a Udin, che istituzions e realtâts associativis furlanis a vevin metût in pîts par domandâ di miorâ il test jessût de seste Commission conseâr.

Il Comitât pe autonomie e il rilanz dal Friûl, il Comitât 482, cu la Vite Catoliche, Radio Spazio 103 e Radio Onde furlane, a difindin cun fuarce la formule dal cidin-assens, che e previôt l'insegnament de marilenghe a scuele par ducj i students, fale par chei che a comunicaran al

istitutù la volontât contrarie. Lu àn dit a clâr ancjemò une volte intune conference stampe lunis ai 8 di Otubar, te sede de Regjon a Udin, preocupâts di ce che al è stât decidût inte ultime riunione de maiorance di Intese Democratiche, cjalant ae fin dal mês, cuant che il Consei regional al varà di votâ lis modificis al disen di leç su la lenghe furlane.

Se la pussibilitât pai Comuns di saltâ fûr de aree furlanofone cui doi tierçs dai conseirs comunâi plui un, e je definide «acetable», difarent al è il discors pal mecanisim di adesion al insegnament dal furlan intes scuelis de aree furlanofone, dulà che la ipotesi di lassâ dut tes mans de autonomie scolastiche, tant che lis modalitâts di sielte pai gjenitôrs, al podarès

dâ problemons di metode in vore de leç. L'autonomist Roberto Dominici al à sclarit. «Intant, si va a çjamâ lis scuelis di incumbencis formâls, la ativitât di programazion dai istitûtis e sarà simpri plui faturose». Cence dismenteâ che «si ufint il furlan te sò dignitât, parcè che, ogni an, al varà di pretindi pai siei fis un drit, chel dal insegnament dal furlan a scuele».

Un rivoç ae necessitât di une leç atuative fuarte dongje de 482, «semplice e efficace» te direzion za cjapade sul prin de Zonte regional, al è rivât dal retôr de Universitât dal Friûl, Furio Honsell. «O si insegne il furlan ai fruts tes scuelis elementârs o ben lu si bandone. No je une tierce strade». Improbîbît pierdi di voli l'obietif, chel di «permeti ançe l'ûs veicolâr dal furlan tes scuelis elementârs, e in mût significatîf», cence dismenteâ di frontâ te leç il grop de preparazion dai insegnants. Lis lenghis minoritariis a son sorevivudis ai tentatîfs di assimilazion fats dilunc dai secul. Chest valôr, cumò, al va trasmetût ai plui zovins, cence esitazioni. E cence tirâ fûr la bufule dal contrast cul inglès, al à marcât Honsell, ricuardant che la marilenghe no puarte vie nuie a chês altris materiis e sotliniant la puartade storiche di chest moment pal avignî de marilenghe: «Dal sigûr l'inglès al è indispensabil, ma miôr di dut al sarès fâ inglès e furlan. Parcè no vino di cjapâ sù cheste oportunitât strasordenarie? O si

ingrampe cumò o si piert par simpri». Ve alore l'incoraggiament al Consei regional a «sintî e agjî in mût efficace». Insom, «no si capis parcè che si met a puest un quadri, un palaç, lis robis materiâls e un patrimoni culturâl imateriâl, tant che une lenghe, nol ven sostignût cun ançjetante convinzion di dutis lis istituzions. Bandonâ il patrimoni linguistic di cheste region e je une responsabilitât grande che difensôrs e sostenidôrs dal rignuviment dal Friûl no puedin acetâ».

Di cuintri aes pressions dai ambients triestins e pordeonês, Baracetti al à invidât Illy, «dopo la clamorose marce indaûr, a dimostrâ «di jessi il president di dute la region, no dome di une part» e «a lavorâ pe unitât e coesion». Alfin, une peraule sul câs Strassoldo. «Se cualchidun al à pensât di sfrutâ cheste storie cuintri la furlanetât sal smentei, chel che al è sucedût noi coinvolç chei che si son impegnâts in chest percors».

Dongje di lamentâ i ultins pas indaûr su ponts de leç za concuardâts e i atacs continuâts de ale diestre de Cjase des libertâts, i organizadôrs de iniziative a àn ançe pandût la lôr preocupazion pal ûs strumentâl de cuestion des varietâts slovenis e a àn domandât che la Regjon e proviôt in curt ançe a di un proviediment di tutele pes varietâts todescjis feveladis in Friûl.

ERIKA ADAMI



Te foto: Arnaldo Baracetti al cisiche te orele di Furio Honsell.